

# **SAWI BAM AFÉRIKAYE KELA HAKKIYA-A KEJI FANDA YALLE-AYEN**

Translated by: Michel Bodet Mai Moussa Mai

**Awowa aniye kelan fandana:**

**NASHA BURWOYE: HAKKIYA-A WAJEPPE-A**  
Sura burwoye – hakkiya-a sériwo yalle-a

**Kal 1- Awowa larduwa curon dasaanadəro dolero waljegənadə**

**Kal 2- MAANA YALLE**

Curo bam adəyen maana «yal»ledə tima adamgəna kərwu 18 najəgənni fi yaye.

**Kal 3- GAYIRDANAMBU**

Raayi fərdula. Yal fi yaye hakkiya-a afu-a nowada bam adə mərse cinadəye hakki tayilan faidaduye cədana ani gayirdannin: jiri, kewu kabilaye, jiri tiyiye, kamu bi kongwa, təlam, adin, siasalan dəga bi naptu curo larduyen bi jamayen, arsiyi, tambo bi naptu kəndəgaiye koro ngaima kanji amwurawanjuen bi nanbanju diomayen.

**Kal 4- MƏRADU KURA YALLE**

1. Curo awo yal wujəna kam laa bi kənduwoma laa cədi fiyen, məradu kuradə yaldə tima kam burwoman daraja njoye wo.
2. Fudu sharaye bi kidarambe yal rakce jandejiya wujiya, casakke yaldə jandeje kərənjai bi wakkil laa na fududəyero isəna cuju yaldəyen jandeji koro mananjudə kənduwoma jussənadə darajaji wadawa tayilan kida cadidə wuljanadə gai.

**Kal 5- ROA DƏGA-A FUWUMBUI-A**

1. Yal fi yaye hakki roa dəgaye cədana. Hakki adə har abada abadaye. Hakki adəa wada səriwoji.
2. Larduwa bam adən faidadaidə casakke yoji nguson, roa dəga, səriwo-a fuwumbui yalle-a sajai.
3. Shara karmoye yallaa biwu cadəna nangaro cədaiwawo.

**Kal 6- CU-A NANKAM LARDUYE-A**

1. Yal fi yaye sa tambənaman hakki cu fandoye cədana;
2. Tada fi yayea bamlan ruwujai sa tambiya;

3. Tada fi yaye hakki nankam larduye cədana;
4. Larduwa bam adən faidadaidə nia ngojana wadawanjadən yal hakki nankam larduye cidi tambənaye fandoye koro yaldə nankam larduye lardu gadeye yaye wadawa lardudəye wuljanadə gainin cuwandi mbejiro waljoro.

#### **Kal 7- RAAMDE**

Yal fi yaye rakce jandejidəro, hakki raayiyanju kəla awi yayeyen rawonjun manaduye cədana koro raayiyanjudəa isanoduwu jiri wada amarjənadə gainin dio amarjagai.

#### **Kal 8- KUNGIYA KOKTA**

Yal fi yaye hakki rawonjun kungiya-a cammo hangalsango bawoa-aro ngawoye wada wuljənadə gai cədana.

#### **Kal 9- RAWON YAKINDU, HANGALLAN FAIDADU-A ADIN KƏREDU-A**

1. Yal fi yaye hakki rawon yakindu-a hangallan faidadu-a adin kəredu-aye cədana.
2. Amwurawa, bawoa, nanbawa dioma, galaso caddi koro jawallaso fəlejagai hakkiya anin faidaduro raktu-a məradu kura yalle-a turuialan.
3. Larduwa bam adən faidadaidə awo amwurawaro, bawoa, nanbawa diomaro dolero waljəgənadəro daraja cadi. Awo adə tima galawa-a jawalla-a kəji fanda hakkiya aniye jiri wadawa-a siasawa larduye-an kəlanjun faidadaidə gai.

#### **Kal 10- SƏRIWO NAPTU KƏLAYE**

Yal fimaye curo naptu kəlayenjuro am fannjayero bi ledəgəramnjuro bi darajanjuro bi cuaro waljənadəro ci njakko jussənni laa bi awo dəpkada laa caddiwawo, adə yaye hakki kəla yalnjaye ngəlaro kuroye cadanaman.

Yaldə hakki səriwo wadaye kəla ci njakko bi diwi njəddoyen cədana.

#### **Kal 11- ALAMDA**

1. Yal fi yaye hakki alamduye cədana.
2. Yal alamdudə ania wujo:
  - a) Yalle nan'yal-a nodunju-a raktuwanju kanji hangallen-a tiyyien-a kəjiro tadoro duno njo-a fuwumbinja dio-a;
  - b) hakkiya kambe-a naptu kəlaye-a tayi curo kakkaduwa gadegade afərikayen kəla hakkiya kambe-a jamaye-an ruwujana koro jawawiya-a fanduwa duniala kəla hakkiya kamben dasaana-aro darajaro duno njo;
  - c) daraja ambe-a adala-a afərikaye ngəla ngəladəa səriwodu-a duno tayiro njo-a

- d) yalla dabbardu curo jama jæktu gænin dæganayen hangal fanduye-a kasattuye-a jandeduye-a kamanjuro daraja njoye-a nansawa katte jamawaye-a kewuwa kabilawaye-a, jiriyaye-a jamawa adinwuye-an kændægai jussæna tædoro;
  - e) larduye nankam kælanjuye fando-a nantilonju-a særiwodu;
  - f) nantilo-a bana kamanjuro kudo-a afærikaye tædiro dio-a duno njo-a;
  - g) kændægairam-a nemawa cidiye-aro daraja njo yakkæme dio;
  - h) karwun kæske nanlewa yalle noduro duno njo.
3. Larduwa bam adæn faidadaidæ jawalla jussana sammaa majai hakki adæn ngælaro faidadaro koro nia ania dioye ngojana:
- a) kunguna deyen ilmu njækkærail koro doleyero dio;
  - b) lokkol dawuye jiri gadegade kada kokta-a yakkæme fuwu jawui ngan deyero falji wundu yaye rakce ngayiro waljiro duno njo;
  - c) ilmu kuruwu wunduye rakce cuwandiro tædi, raktu-a naptu wunduye yaye turui-an jawalla jussana fin yaye ;
  - d) jawalla lokkollaro kamdiyawon sawiso leduyero duno njoye madu koro miami lokkol kolduye gærdo ;
  - e) jawalla masammanne yalla ferowa ilmua-a banadægænni-a alamdarø kwangawa-a kalkal na jama dasaana samman madu.
4. Larduwa bam adæn faidadaidæ hakkiya-a wajæppa-a amwurawa yallaye, bawoa, nanbawa diomaye, yallanjaro ilmu njækkærairam jamala gæni gade kærejagaidæ kasaccæ amma sai awowa gomnati wuljænadæye gænanju yaye cadiya, alamdu adinne-a ladabu gardaye yalle raktu yalle turuialan tækkararo.
5. Larduwa bam adæn faidadaidæ jawalla jussana sammaa majai yal wada ilmu njækkærairambe bi amwuranjuye gamadæa naptu adamgænayen cada koro daraja yallero bam adæ wuljænadæ gailan daraja tioro.
6. Larduwa bam adæn faidadaidæ jawalla jussana sammaa majai ferowa kawu alamdanja ceriro curo ngojanadæ rakcane wundunjaye raktunjun kæranju cædoro.
7. Awo kal adæn wulduna fima rakce kam laaro bi kidaram laa bi ilmu njækkærairam laa kokturo bi nodoro kutturo fisardiawo, awowa kamdu 1 kal adæyen wuldunadæ daraja ti koro ilmu njækkærairam adæn ilmu tækkaranadæ awowa gomnati wulnjænaye gænanju yayero daraja cia.

#### **Kal 12- KEJIFANDA, KIDAWA KAASULA-A ADALA-A**

1. Larduwa curon mukkonjaadæ yallo hakkiya ania nojagana: hakki tustu-a kæjifanda-aye, hakki bikkeye-a kidawa kaasula kærwunjuro jussana dioye-a rawonjun awo adala-a sania wujæna-aro mukko njakkoye-a.

- Larduwa curon mukkonjaadə hakki yalle ngəlaro awo adala-a sania wujəna-aro mukko njakkoye casakke tədi koro darajajai kidawa adala, sania wujana, kaasula-a kəjifandaye jussana-a tayi samma cadidəa casakke ngəwujaialan.

### **Kal 13- YALLA MASKINNA**

- Yal duwon hangal leyadaa bi maskində hakki jawalla masammanne səriwoye məraduwanju tiyiye-a kanji hangalle-aro kəji koro na darajanjuro mərse tin koro naptunju-a mukko njakkonju naptu curo jamayero isakəjjija cədana.
- Larduwa bam adən faidadaidə kunguna cadanan nia yal maskinna-a am tiro kistiwu-aro bana tuworəna naptunjuro jussənadəa cakkudi koro casakke yal maskində alamda cuwandi, sania kərio-a kidawa kaasula-aro dabbardi curo jamayero ngawo naptu kəji cuwando, kəjiro dəga fuwumbui adala-a hangalle-a cuwandoro.
- Larduwa bam adən faidadaidə kunguna cadanadən faidadane yalla hangal leyada-a maskinna-aro awowa kəmbaye tayilan fadowa sameye jamala tədandəna-a gade-aro maskinna tattu caragənadə taccaro cadi.

### **Kal 14- NANLEWA-A KIDARAMMA KARWUN NJƏDDOYE-A**

- Yal fi yaye hakki nanlewa tiyiye-a hangalle-a ngəlan dəgaye cədana.
- Larduwa bam adən faidadaidə hakki adən ngəlaro yalla faidadaro jawalla ania dioye madaro nia ngojana:
  - karmo cu tədənnin-a timalle-a fuludu;
  - kareya kidawu lowotordiye-a karwun nanlewaye jussana-a mado yalla sammaro təddo fuwumbui karwun nanlewaye burwoye diolan;
  - kəmbo ngəla-a ingi njaro ngəla-aye mennaro waldı;
  - karwun nanlewaye burwoye dion kasuwa-a ambadiwi-aro məldu;
  - karwun jussəna kamuwa curoa-a cakkambi-aro njəddo;
  - jawalla kasuwaro kaduye-a alamda-a koro kidaramma kənjambi kastaye-a ngəwuro tədo;
  - curo fasalla fuwumbui larduyen fasalla kidaramma nanlewaye njakko;
  - nashawa jamaye masammanno amwurawaye, fuwuwu jama yallaye-a kidawu jamaye-a lawar-a duno-a tio nodu kəmboye kanji nanlewa-a amba yalle-an faidadaro: faida təgam njoye, nanngəla naye-a tajirwawa fadon wakkajiaro kadu-a gade-a;
  - kungiyawa naptu kəlanjaye diowu-a jama bəlaye-a jama riwa bowu-a, fasal-a nodo fasalla kidaramma nanlewaye yallayero bowonowo ngəlaro mukkonja casakko;
  - dəlwuwa dawariya-a kunguna-ayelan bana nemawa jama bəlaye capturo kudowo fuwumbui karwun nanlewa burwoye yallaye yojoro.

### **Kal 15- KIDA YALLAYE**

1. Yaldə tilan faidadu kunguna madaro-a kida tiro tajirwa cukkudi bi kəra dio tiro dapciyi bi nanlewanjuro kuttu bi fuwumbui tiyinjuye-a hangalnjuye-a naptunju curo jamaye-aro kutturo səriwoda.
2. Larduwa bam adən faidadaidə jawalla jawal wadaye-a kidaramma jussanaye kal adən kəjiro kida tədoro majai. Kal adə kidaramma gomnatila-a kəma-a kidaramma kidaye camun-a wujo wadawa jussana kareya kungiya duniaye kidaye yallayen tədo tənnadə gai. Larduwa curon mukkonjaadə nia ania dioye ngojana:
  - a) wadalan kərwu gənanju kida adəa bi todəa dioye wuldu;
  - b) wadawa jussana sa kidaye-a naptu kidaye-a kəlan fandu;
  - c) kal adən ngəlaro kida tədoro wowomma jussana bi gade madu;
  - d) na jama kida cadi samman lawarra tajirwa wujanadəa wulduro.

### **Kal 16- SƏRIWO KELA KOJEGENA-A DIWIRO TA-AYEN**

1. Larduwa curo bam adəyen mukkonjaadə jawalla jussana wadaye-a kidarammaye-a jamaye-a alamdu masammanne-a majai yalla basari jiri fi yayero, ta adamgənaro kutturo bi nangua masammanno tiro mukko gənaduwu bi hangalnu jadu, kistuwunambu bi kistuwu diwi, tadiwi durnju laa nanjun dəgana nangaro bi nanbawa dioma bi mushe bi kam gade yallo kistuwaro səriwodu.
2. Jawalla səriwoye curo kal adəyen mananja cadənadəye curon dəlwuya kidaramma kəla kuroye masammanne yal-a am tiro kistuwu-aro bana jussəna kudoma koro jawalla gade kaduye, asuduye, kistunambu bi ragən diwi yallo təddəna wulduye, dəlwu sharaye-a kəla adəyen sisi dioye-a kəlanju karwun fando-a tia ga-aye kokcái.

### **Kal 17 – KIDARAM SHARAYE YALLAYE**

1. Yal wowom jəganniro talamdəna bi biwumaro ngodəna fi yaye hakki tiro kistuwu masammanne daraja-a taman-a yallero jussəna, daraja yalle hakkiya kambe-a naptu kəlaye am gadeye-a dunoaduwuro cədana.
2. Larduwa curo bam adəyen mukkonjaadə ania cadi :
  - a) bare yal rowada bi koson dəgana bi afu fuccəna fima basari laa bi wowom adəmgənaro diwi bi nangua laa caddənniro tai dajane carui ;
  - b) na am rojana bi koson dasaanadən casakke amwurawa-a yalla-a fajai;
  - c) yal wowom jəganni cane talamjana fi yayero ngai təddo:
    - i. biwubawomaro ngodo har kawu ti biwumaro asudiro,
    - ii. dalla dallaro awo tiro kərjaanadəa tiro wuljaa koro təlam tiro jandejagaidəa fanjiyawoa fisarduma tiro majaga,

- iii. banama wadaye wuljəna bi gade jussəna dabbardo kəlanju cumoworo cuwandi,
  - iv. duwan yojia, tiro shararam jire tədin shara caddo koro ti biwumaa jawal cuwando shararam kuraro sonju cado,
- d) Jeridawu-a jama-aro na shara kamdidəyero ledu daptuwu.
3. Məradu shara yalle adən madidə tima ti wowom jəganni cane biwamaro tia ngoyeraa, tia sagadu-a curo jama fannjayero kalaktu-a curo jamayen nanju cayero waldu-a.
  4. Kərwu gana laa mado, yaldə tia najəgənnia, rakce wowom jəganniro waljiwaworo waljoro.

#### **Kal 18- SƏRIWO AM FADOYE**

Am fadoyedə tima fərdü jamayero. Naptunju-a fuwumbuinju-aro gomnati tia səriwoji tiro bana cukkudi.

1. Larduwa bam adən faidadaidə jawalla jussana majai jawal nankalkal hakkiye-a kalaro ngoda kamu-a kwa-aye kanji yallayen curo naptu niyayen-a sa faidanayen-aye tədiro waljoro. Faidu wakkayenoa, səriwo yallayero dawari madu;
2. Yal fima naptu niyaye amwurawanjuye nangaro kistuwu fando fucciawo.

#### **Kal 19- KISTUWU-A SƏRIWO-A AMWURAWAYEN FANDO**

1. Yal fi yaye hakki səriwo-a kistuwu-a amwurawanjuyen fandoye cədana koro yojia, kallo dasayı. Yal fima rawonjun gəni ti-a amwurawanju-a fajaiwawo jırı wadawa kəlanjun wuljanadə gai juju gəni niajoa, koro faidu adə riwa kura yallero waljiya duwon.
2. Yal duwon amwurawanjuye fal-a bi tayi yindi samma-a faidanadə hakki tayia tagawi kəlanjuye-a tayi-a amwurawanju yindi-a sawi yaye tadoye-a cədana.
3. Faidudə kidawu gomnatiyen sayenoa, casakke yaldə bi kam laa fannjaye lawarra jussana na yanju bi bawanju bi tayi yindi samma kəndəgai cadiye cuwandi. Larduwa curon mukkonjaadə casakke koro jırı adə kuttu kam bi am kəlanjun koro adə tədənadəro bare cukkudənniro carui.
4. Yal laa am laa gomnatiye kedaa, amwurawanju bi nanbawa diomanjuro duwaduwan isanojagai.

#### **Kal 20- KƏLARO NGODA AMWURAWAYE**

1. Amwurawa bi am gade yallaro kistuwudə tayima burwosallambo alamda-a kəji fanda yalle-a kəlaro ngojai koro ania dio tayiro wajəp:
  - a) bare təmmaro awo yallo kəji cəpcaganni;
  - b) naptunja-a raktunja kanji kungunayen turuialan na kəndəgaiye kəji-a kəjifanda yalle tədi-a yallo majaga;

- c) kengai fadola yaldə nan'adamgənan tədana koro daraja daraja adamgənaro tilan tədoro cado.
2. Larduwa bam adən faidadaidə ləman cadana-a naptunja-a turuialan jawalla jussana sammaa ania dioro majai:
    - a) bana amwurawaro bi am laa yalla kəlaro ngojanaro kudo koro məradu laa wakkayenoa, fasalla karelan bana njukkudoye-a bana-a madu masammanno kanji ambayen, nanlewayen, alamdayen, kajəmuyen, fadoyen;
    - b) amwurawa bi am laa yalla kəlaro ngojanaa banaduwu tayia yakkəme awowa yallo njəddoye tayiro wajəpcəgənadəa cadoro koro casakko fuwumbui kidaramma yallaro kistuwuye tədo;
    - c) casakko yalla amwurawanja yindi samma kida cadiðə kareya cawando koro kidaram renoyerə tayia casado.

#### **Kal 21-SƏRIWO AWOWA JAMA-A ADA-ARO DIWIRO**

1. Larduwa bam adən faidadaidə jawalla jussana sammaa majai ada so, awowa dioye, adala so, jamaye so diwi, yalle kəjiro dəga, daraja, kuradu, fuwumbui ngəlaro kuttu dapciyi tədiaworo dioro masammanno:
  - a) ada-a awowa nanlewaro kuttu, kəndəgai yallero kuttu;
  - b) ada-a awowa gayirda yalla laaye naptunja (kwanga bi kamu) bi dəlwuwa gade nangaro tədi-a.
2. Larusa yallaye-a alkawoli ferowa-a kwangawa-a niya njəddoye ngoda-adə dapkada koro dəlwuwa wadawa curonna ngojai kərwu gananju niyayedəa kərwu 18no dioro koro niya sammaa curo bam gomnatiyen ruwuduro.

#### **Kal 22- LAWALAWA BARIMIA**

1. Larduwa bam adən faidadaidə wadawa hakki adamgənaye duniala sa lawala barimia wakkajiya yallaa masammanno lejidəa nia darajaduye koro casakke darajaduye ngojana.
2. Larduwa bam adən faidadaidə jawalla jussana sammaa majai bare yal fima awowa waadaro mukko casakkənniro koro masammanno bare yal fima sojiro ngojanniro.
3. Larduwa bam adən faidadaidə awo tayiro jawal hakki adamgənaye dunialan dolero waljəgənayen, lawala bərimia wakkajiya jama soji gənia səriwodu koro dəlwuwa yojəna samma səriwo-a kistuwu-a yalla curo lawala barimia wakkajənayen dasaanaro kudoro majai. Awowa ani yalla curo lawala bərimia bi hangalsangoyen dasaanaa leji.

#### **Kal 23- YALLA HIJIRAWU**

1. Larduwa bam adən faidadaidə jawalla jussana sammaa majai yal naptu hijiramaye maji bi hijiramaro ngodənadə hakki duniala bi larduye adəa wujənadən tia amwurawunju, nanbawa dioma bi dur karənne laa casadduna bi casadduwunnin kal səriwo-a bana

jamaro tæddi-a hakkiya tiro wajəpcəgəna bam adən wuldənadən koro kareya duniala hakkiya kambe-a hakki adamgənaye larduwadə kasaccanan-an faidadu cuwandi.

2. Larduwa curon mukkonjaadə kungiyawa duniala hijirawua səriwojai koro bana cakkudidəro bana cakkudi curo kidanja yalla mananja kamdu 1 kal adəyen cadənadəro səriwo-a bana-a cakkudoro koro amwurawanja-a durra karənne yalla hijirawu runja dasaanaye maja cawando lawarra jussana tayia am fannjayero kalaktuwuro cawandoro.
3. Amwurawadən faljama, nanbawa dioma tuwandənnia, koro nanbawa dioma bi dur karənne laa tuwandənnia, yaldəro səriwo sa kamgadaa bi sawisoye tada kəmaa dawu am fannjayen dəlwu fiyero walyeno gairo caddi.
4. Wadawa kal adəyedə faldaialan yalla curo larduyen masiwa, lawala, hangalsango, kunguna bi naptu curo jamaye kuttanju bi awo gade laaro sənaktanadəa lejai.

#### **Kal 24- DAPTU**

Larduwa curon mukkonja daptu dio nojanadə casakke riwa kura yalle nasha fin yaye mennaro walji koro ania dioro niajana :

- a) kidaramma kidanja nojana koktu kəla koro daptuyen nia ngoja koro daptudəa jiri wadawa-a fuduwa tia wujəna-an koro lawarra jireye tawandəna daptudə amardi naptu yalle kanji amwurawanjuen, durranju karənnen-a nanbawanju diomayen turunan, adə yojənnia, am awodə tayia wujənadə daptudəa ngawo gala ngəla tayiro tinan tayima kasaccaa tədoro.
- b) larduwa fandu dunialaro bi bam adəro mukko casakke ngasaanadən daptu lardu gaden yallo kistuwuro diodə sai lardudən yojənniya duwon tədi. Adə ye lardunju tambənadən am fadoye na naptuye bi daptuye tuwandənni bi lardunjudən tiro jiři jussənan kistuwuro təmmaro yojiwawoa duwon ;
- c) yal lardu gaden dapcanadə səriwo jiri daptu lardunjun tədi gainin cuwandro mado turo;
- d) jawalla jussana sammaa maja daptu lardu gaden tədidə sawur bi kunguna laa jussənni fandoro gəni am yaldəa dapturo majaidə cadiro nodu ;
- e) məraduwa kal adəyedəro duno tio taawa katte lardu yindi bi ngəwuyen dion koro casakko yalla lardu gaderə yadəme gənadu fuwuwu bi kidaramma kidanja nojana cadiro waljo;
- f) kidaram laa cakke kəjin dəga yal dəpkadayedəye kəla kuroma koktu.

#### **Kal 25- AMWURAWAA FAIDU**

1. Yal duwon kawu ganaro bi sawisoro dalil laa cakke kəndəgairam dawu am fannjayen fuccənadə hakki səriwo-a banna jussənaye-a cədana.
2. Larduwa bam adən faidadaidə nia ania dioye ngojana:

- a) yal ngəni bi kawu ganaro bi sawisoro dawu am fannjaye-a faidana bi kəjinju nangaro dawu adəa koljənadə kistuwu am fannjaye caddi gai cuwandi, fado laa am gənaduyen bi kidaram laa ngəla yallayen gənajai;
  - b) jawalla jussana sammaa majai yal-a amwurawanju-a majane kəlduro na faidudə curo larduyen bi lardu gadeyen sənaktu lawala barimia bi masiwa laa cakke tədənadən;
3. Yalla kidaram laa gənaduye bi daptuyen gənadu cadiya, riwa kura yalle turo koro yalla alamdu fuwu juwuiro waljo koro jiri-a adin-a təlam jandeji-a yalle turo.

#### **Kal 26- JIRIRO FAIDU-A GAYIRDA-A**

1. Larduwa bam adən faidadaidə tilo tiloyen bi kəlladan məraduwa masammanne yalla na jiri faiduan dasaanayero nia kura burwon kistuwuye ngojana.
2. Larduwa bam adən faidadaidə nia ngojana tilo tiloyen bi kəlladan məraduwa masammanne yalla na dasaanalan gayirda təddiro koro larduwa sojiya turu cadiro nia kura burwon kistuwuye ngojana.
3. Larduwa curon mukkonjaadə nia sa yojia, fi yaten bana kareye yalla aniro kudoye ngojana koro jawal jiri gayirda-a jiri faidu-a cidi afərikayen tədidəa baworo dio koworinja kanjidəro cadəna.

#### **Kal 27- FƏRDULAN FAIDADU**

1. Larduwa bam adən faidadaidə nia yallan faidaduye bi fərdunjuro diwi njəddo-a jiri fin yaye səriwoduye ngojana koro masammanno jawalla ania daptuye majai :
  - a) yallaa yakkəme bi duno yime fərdunjun ləman madu ;
  - b) yallaa yakkəme nanbordel bi awo fərdü wujəna fi yaya dion faidadu ;
  - c) yallaa yakkəme curo kidawa-a bikke-a bi worma səlma kənjənan faidadu.

#### **Kal 28- KOYA NJA**

Larduwa bam adən faidadaidə jawalla jussana sammaa majai yallaa awowa kənəmbo cakki-a hangalnin cuttuluwi-an jiri fandu duniala jireyen wuldənadə gainin faidadu dapturo koro yallan faidadu curo awowa ania dio-a sawurdu-ayen dapturo.

#### **Kal 29- LADO, SAWUR, DUNON NGODU, LOWO**

Larduwa bam adən faidadaidə jawalla jussana ania dapturo ngojai:

- a) dunon ngodu, lado bi sawur yallaye awo laa dioro fi yaye, jiri firo walyeno yaye wunduyen kadio yaye amwurawanjayen kal nanbawa diomanjuyen kal;
- b) yallaa lowo dion faidadu.

#### **Kal 30- YALLA YANJA KOSON JAKKADAAYE**

Larduwa bam adən faidadaidə kamuwa curoa-a yawa timallaye-a yalla sananaye-a burwujana bi sharajane biwu wadaro caddənaro ngojanaro nia ta masammanne njəddoye ngojana koro nia gadea gade awowa ania dioye ngojana :

- a) shara gade kosoro njakkoye gəni burwon kamuwa aniro caddo sa shara caddidənno turo ;
- b) jawalla kosoro njakkodəa kidaram kamuwa aniro kistuwuyenno faljairo cadi madu koro duno njo ;
- c) kidaramma masammanne kamuwa ania roduye dio ;
- d) kamu-a yalnju-a kallo koso dio dapturo cinəme dadu;
- e) shara karmoye bare kamuwa ania cədanniro cinəme dadu;
- f) kosoramlan məradu madidə tima faldu dio, yaa curo jama fannjuyero kalangəme njakko-a curo naptu jamayen na cayero kalaktu-aro waljoro cinəme dadu.

### **Kal 31- KƏLARO NGODA YALLAYE**

Yal fi yaye kəlaro ngoda kanji am fannjayen, jamayen, gomnati-a kəwu jamaye naptu kəwuye cədiro nowada-a jama duniaye-a cədana. Yal kərwunju-a raktunju-a turuialan awowa curo bam adəyen kojaiwawo cannaro kajiya wajəp aniyə cədana :

- a) cakke curo am fannjayen kəlakəl dio, amwurawanju-a fuwuunju-a am kawu jawuna-a ndaran yaye darajadu koro bana məradunjaro njukkudo ;
- b) jama larduyero duno tiyinjuye-a hangalnju-alan faidadu ;
- c) curo jama-a lardu-ayen wunduye kamanjuro bana njukkudo səriwodu koro dunoaduwu ;
- d) adawa afərikaye tamanna səriwodu koro dunoaduwu curo naptunja mambərra gade jamaya, kamanjua kasattu-a, jandedu-a sawardu-a tədialan koro kəjin dəga jamayero mukko njakko ;
- e) nankam kəlaye fando-a nantilo larduye-a səriwodu koro dunoaduwu;
- f) ngəlaro raktuwanjun ndaran yaye koro nasha fin yaye kəlakəl afərikaye yojoro duno njoro mukko njakko.